



REPUBLIKA E SHQIPËRISË  
KËSHILLI I LARTË I PROKURORISË

VENDIM

Nr. 231, datë 12.11.2019

**PËR MIRATIMIN E RREGULLORES PËR RREGULLAT E GARANTIMIT TË MBROJTJES SË DETYRUESHME DHE CAKTIMIN MBI BAZËN E PARIMIT TË ROTACIONIT TË AVOKATIT MBROJTËS, NGA LISTA E AVOKATËVE QË OFROJNË SHËRBIMET E NDIHMËS JURIDIKE DYTËSORE, NË PROCESIN PENAL**

Në mbështetje të nenit 49, pika 7 dhe nenit 49/a, të ligjit nr.7905, datë 21.03.1995 “Kodi i Procedurës Penale i Republikës së Shqipërisë”, i ndryshuar, të nenit 21, pika 6, dhe 7 të ligjit nr. 111/2017 “Për ndihmën juridike, të garantuar nga shteti”, të nenit 159, pika 2, të ligjit nr. 115/2016 “Për organet e qeverisjes së sistemit të drejtësisë”, Këshilli i Lartë i Prokurorisë,

**V E N D O S I:**

1. Miratimin e Rregullores “Për rregullat e garantimit të mbrojtjes së detyrueshme dhe caktimin mbi bazën e parimit të rotacionit të avokatit mbrojtës, nga lista e avokatëve që ofrojnë shërbimet e ndihmës juridike dytësore, në procesin penal”, sipas tekstit që i bashkëlidhet këtij vendimi.
2. Ky vendim hyn në fuqi në datën e botimit në Fletoren Zyrtare dhe publikohet në faqen zyrtare të Këshillit të Lartë të Prokurorisë.



**KRYETARI**

**GENT I BRAHIMI**

Këshilli i Lartë i Prokurorisë, Rruga “Qemal Stafa” Nr. 1, godina e Prokurorisë së Përgjithshme, Tiranë

[www.klp.al/](http://www.klp.al/) adresa e mail; [info@klp.al](mailto:info@klp.al)

## RREGULLORE

### PËR

## "RREGULLAT E GARANTIMIT TË MBROJTJES SË DETYRUESHME DHE CAKTIMIN MBI BAZËN E PARIMIT TË ROTACIONIT TË AVOKATIT MBROJTËS NGA LISTA E AVOKATËVE QË OFROJNË SHËRBIMET E NDIHMËS JURIDIKE DYTËSORE NË PROCESIN PENAL"

Në zbatim të nenit 49 dhe 49/a, të ligjit nr. 7905, datë 21.03.1995, "Kodi i Procedurës Penale i Republikës së Shqipërisë", i ndryshuar, të nenit 21, pika 6 dhe 7 të ligjit nr.111/2017, "Për ndihmën juridike, të garantuar nga shteti", të nenit 159, pika 2 të ligjit nr.115/2016, "Për Organet e Qeverisjes së Sistemit të Drejtësisë", Këshilli i Lartë i Prokurorisë,

### V E N D O S I:

1. Miratimin e rregullave të hollësishme që lidhen me garantimin e mbrojtjes së detyrueshme dhe mbrojtjen për të pandehurin pa mjete të mjaftueshme financiare, në procesin penal, nga ana e institucioneve të parashikuara në ligjin nr. 111/2017 "Për ndihmën juridike të garantuar nga shteti".
2. Organi procedues që fillon hetimet detyrohet të zbatojë rregullat për caktimin mbi bazë të parimit të rotacionit, të avokatit mbrojtës dhe zëvendësimin e tij, nga lista e avokatëve që ofrojnë shërbimet e ndihmës juridike dytësore në procesin penal.
3. Dhoma e Avokatëve të Shqipërisë, brenda datës 1 shkurt të çdo viti kalendarik përcjell listat e miratuara, sipas procedurës së poshtëshënuar si dhe i publikon ato në faqen e saj zyrtare.
4. Dhoma e Avokatëve të Shqipërisë organizon shortin në një ambient të përshtatshëm dhe njofton paraprakisht avokatët, që janë pjesë e listës për të qenë të pranishëm. Njoftimi përmban datën, orën dhe vendin e zhvillimit të shortit.
5. Pas zhvillimit të shortit, Dhoma e Avokatëve të Shqipërisë rendit avokatët sipas rendit alfabetik. Përzgjedhja e avokatëve bëhet me rotacion në mënyrë të njëpasnjëshme nga lista, duke filluar nga nr.1 i listës, më pas kalohet tek nr. 2 dhe kështu vazhdohet me radhë deri në mbarimin e listës.
6. Avokatët e përfshirë në listën e ndihmës juridike ushtrojnë funksionet e mbrojtësit ligjor në procesin penal;
  - a. Për të pandehurit pa mjete të mjaftueshme financiare, sipas kriterëve të parashikuara në ligjin nr.111/2017, "Për ndihmën juridike, të garantuar nga shteti".
  - b. Për të pandehurit që ndodhen në kushtet e mbrojtjes së detyrueshme sipas parashikimeve të nenit 49, pika 7 dhe nenit 49/a të Kodit të Procedurës Penale.
7. Lista e parë përbëhet nga avokatë që plotësojnë kriteret e përcaktuara nga Dhoma Kombëtare

---

Këshilli i Lartë i Prokurorisë, Rruga "Qemal Stafa" Nr. 1, godina e Prokurorisë së Përgjithshme, Tiranë

[www.klp.al/](http://www.klp.al/) adresa e mail; [info@klp.al](mailto:info@klp.al)

e Avokatisë dhe Drejtoria e Ndhmës Juridike Falas.

8. Lista e dytë përbëhet nga avokatët e specializuar dhe trajnuar në çështje për të mitur, për viktimat e trafikimit, dhunës në familje dhe abuzimit seksual.
9. Pranë organit të prokurorisë caktohet një person përgjegjës nga personeli administrativ për respektimin e rotacionit të avokatëve sipas listës së miratuar nga Dhoma e Avokatëve të Shqipërisë.
9. Kur mbrojtja e detyrueshme nuk mund të sigurohet nga lista e vënë në dispozicion nga Dhoma e Avokatëve të Shqipërisë sipas parashikimeve të Kodit të Procedurës Penale, mbrojtja garantohet nga lista e avokatëve që ofrojnë ndihmë juridike dytësore në procesin penal.
10. Avokati i caktuar nga lista e miratuar për ndihmën juridike pushon së ushtruari funksionet e tij si mbrojtës, kur:
  - a. Ekzistojnë kushtet e mbrojtjes së detyrueshme dhe avokati i ndihmës juridike zëvendësohet sipas parashikimeve të nenit 49 pika 6 e Kodit të Procedurës Penale. Në këtë rast, kopja e procesverbalit të zëvendësimit të avokatit e mbajtur pranë organit procedues depozitohet pranë strukturave përgjegjëse që ofrojnë ndihmë juridike.
  - b. I pandehuri pa mjete të mjaftueshme financiare nuk pranon mbrojtjen e mëtejshme të tij, sipas parashikimit të pikës 5, të nenit 24 të ligjit nr. 111/2017 "Për ndihmën juridike të garantuar nga shteti".
11. Organi procedues nis veprimet hetimore që kanë nevojë për t'u bërë në prani të avokatit mbrojtës, vetëm pas një afati kohor jo më pak se një orë, që nis pas paraqitjes së avokatit tek organi procedues me qëllim që avokati të konsultohet me të pandehurin dhe aktet e dosjes hetimore.
12. Në rastet kur ndryshojnë kushtet për gëzimin e mbrojtjes së detyrueshme organi procedues e njofton të pandehurin të aplikojë për përfitimin e ndihmës juridike falas sipas llojit të ndihmës juridike.
13. Organi procedues pas caktimit të avokatit mbrojtës i jep mundësi atij për t'u paraqitur në një kohë sa më të shpejtë në vendin e kërkuar.
14. Organi procedues kontakton me telefon dhe/ose nëpërmjet postës elektronike me avokatin e caktuar në detyrë sipas renditjes të përcaktuar në listën e vënë në dispozicion nga dhoma vendore e avokatisë.
15. Në rast se avokati i përgjigjet telefonatës ose postës elektronike dhe konfirmon mbrojtjen sipas rastit të paraqitur atij i lihet një kohë jo më e shkurtër se një orë për t'u paraqitur në vendin e kërkuar.
16. Me marrjen përsipër të mbrojtjes, avokati i caktuar për mbrojtjen juridike dytësore sipas kërkesave të ligjit nr.111/2017, "Për ndihmën juridike, të garantuar nga shteti", lidhë kontratën për detyrimet e palëve sipas formatit bashkëlidhur kësaj rregulloreje.
17. Në rast se avokati, pas marrjes së njoftimit refuzon marrjen përsipër të detyrës, vijohet me kontaktimin e avokatit të radhës në listë.

---

*Këshilli i Lartë i Prokurorisë, Rruga "Qemal Stafa" Nr. 1, godina e Prokurorisë së Përgjithshme, Tiranë*

[www.klp.al/](http://www.klp.al/) / adresa e mail; [info@klp.al](mailto:info@klp.al)

18. Në rast se avokati nuk i përgjigjet telefonatës ose postës elektronike, atij i lihet një kohë prej 20 minutash për të kthyer përgjigje.

19. Në rast se avokati është i pa disponueshëm, provohet të kontaktohet sërish pas 20 minutash.

20. Në rast të mos kthimit të telefonatës/postës elektronike pas njoftimit të dytë, organi procedues operon menjëherë me kontaktimin e avokatit të radhës në listë.

21. Në rast se avokati në detyrë sipas kalendarit nuk do t'i përgjigjet thirrjes së organit procedues për 3 raste radhazi, kur kërkohet mbrojtja e tij, ai do të kalojë në fund të listës dhe do të zëvendësohet nga avokati në radhë i listës sipas renditjes. Në këtë rast avokati zëvendësues nuk e humbet radhën e tij të caktimit në detyrë.

22. Organi procedues njofton me shkrim Dhomën e Avokatisë së Shqipërisë për rastet e refuzimit dhe/ose mos përgjigjes së avokatëve të caktuar në listën e ofrimit të ndihmës juridike falas.

23. Dhoma e Avokatëve të Shqipërisë merr masa që, nëse ka mungesë të listave të avokatëve të caktuar në një rreth gjyqësor t'i kërkojë dhomës vendore të avokatisë më të afërt me organin procedues të atij rrethi gjyqësor të verë në dispozicion të organeve proceduese listën dhe renditjen e avokatëve të caktuar për ofrimin e ndihmës juridike të garantuar nga shteti.

24. Në momentin e ndalimit organi procedues ka për detyrë që të njoftojë dhe t'i shpjegojë të ndaluarit/ të arrestuarit/të pandehurit:

- a. Të drejtën e tij/saj për të përfituar ndihmë juridike të garantuar nga shteti në rast të pamundësisë financiare për ta përballuar vetë një avokat mbrojtës nga tregu.
- b. Të drejtën e tij/saj për të përfituar ndihmë juridike falas në rast se plotësohen kushtet për të përfituar nga mbrojtja e detyrueshme, sipas neneve 49 dhe 49/a të Kodit të Procedurës Penale.

25. Organi procedues i vendos në dispozicion të ndaluarit/të arrestuarit/të pandehurit për të plotësuar një deklaratë/formular, sipas formatit të miratuar nga Drejtoria e Ndihmës Juridike Falas ku duhet të deklarojë gjendjen ekonomike dhe të shprehë vullnetin se kërkon të mbrohet me një avokat të caktuar nga shteti.

26. Organi procedues vendos rast pas rasti nëse i ndaluarit/ të arrestuarit/i pandehuri mund të përfitojë mbrojtje nga një avokat i caktuar për ofrimin e ndihmës juridike të garantuar nga shteti.

27. Organi procedues merr masa që të kryejë veprimet në prani të avokatit, sipas parashikimeve të Kodit të Procedurës Penale.

28. Organi procedues në caktimin e avokatëve për ndihmën juridike falas respekton

parimin sipas të cilit avokati i caktuar në një fazë të procedimit mbron klientin në të gjitha fazat e hetimit dhe gjykimit.

**29.** Avokati mund të zëvendësohet sipas kushteve të kësaj rregulloreje dhe përjashtimisht nëse plotësohen këto kushte:

- a) Avokati është në kushtet e konfliktit të interesit;
- b) Avokati dhe/ose i ndaluarit/të arrestuarit/i pandehuri paraqet një kërkesë të arsyetuar më shkrim për heqjen dorë;
- c) Avokati nuk paraqitet para organit procedues në mënyrë të përsëritur dhe të paarsyeshme;
- d) Avokati për shkak të rrethanave të jashtëzakonshme nuk është në gjendje për të përfaqësuar klientin në atë çështje;
- e) Shkaqe të tjera të parashikuara me ligj ose akte nënligjore.

**30.** Nëse avokati i caktuar për të ofruar ndihmën juridike ka pengesa për angazhimin dhe vazhdimin e mbrojtjes duhet t'i drejtohet organit procedues dhe Dhomës Vendore të Avokatisë me një kërkesë të arsyetuar.

**31.** Avokati i caktuar nga lista e miratuar për ndihmën juridike pushon se ushtruar funksionet e tij si mbrojtës, kur:

- a) Ekzistojnë kushtet e mbrojtjes së detyrueshme dhe avokati i ndihmës juridike zëvendësohet sipas parashikimeve të nenit 49 pika 6 e Kodit të Procedurës Penale. Në këtë rast kopja e procesverbalit të zëvendësimit të avokatit e mbajtur pranë organit procedues depozitohet pranë strukturave përgjegjëse që ofrojnë ndihmë juridike.
- b) I pandehuri pa mjete të mjaftueshme financiare nuk pranon mbrojtjen e mëtejshme të tij, sipas parashikimit në pikën 5, të nenit 24, të ligjit Nr.111/2017 "Për ndihmën juridike të garantuar nga shteti".

**32.** Prokurori fillon procedurën e zëvendësimit dhe njofton Dhomën e Avokatisë së Shqipërisë.

**33.** Avokati do të vazhdojë të qëndrojë në detyrë derisa ai të zëvendësohet me një avokat tjetër.

**34.** Organi procedues i kërkon të ndaluarit/të arrestuarit/të pandehurit që të plotësojë formularin sipas formatit të miratuar nga Drejtoria e Ndihmës Juridike Falas për vlerësimin e punës së avokatit të caktuar.

**35.** Për viktimat e veprës penale dhe viktimat akuzuese për pretendimet e tyre në lidhje me ngritjen e padisë civile brenda dhe jashtë procesit penal zbatohen rregullat sipas udhëzimit për rregullat e zbatimit të parimit të rotacionit në caktimin e avokatëve që do të ofrojnë ndihmën juridike.

**36.** I padituri civil në procesin penal si rregull mbrohet nga i njëjti avokat i caktuar për të

ndjekur procesin penal. Në rast se avokati nuk dëshiron të ndjekë çështjen civile, avokati zëvendësohet sipas rregullave të rotacionit dhe sipas kalendarit të çështjeve.

**37.** Shpërblimi për punën e kryer nga avokati gjatë procesit të dhënies së ndihmës juridike falas bëhet;

- a. Për ndihmën juridike për personat pa mjete të mjaftueshme financiare kryhen nga Drejtoria e Ndhmës Juridike Falas pranë Ministrisë së Drejtësisë.
- b. Për ndihmën juridike në kushtet e mbrojtjes së detyrueshme sipas parashikimeve të nenit 49, pika 7 dhe nenit 49/a të Kodit të Procedurës Penale, kryhet nga Organi i Prokurorisë.

**38.** Ngarkohen për zbatimin e kësaj rregullore Organi i Prokurorisë dhe Policisë Gjyqësore, Dhoma e Avokatëve të Shqipërisë, Dhomat Vendore të Avokatisë, Drejtoria e Ndhmës Juridike Falas.

**39.** Kjo rregullore hyn në fuqi pas botimit në Fletoren Zyrtare.

## **KËSHILLI I LARTË I PROKURORISË**

**KONTRATË**  
**PËR OFRIMIN E SHËRBIMEVE JURIDIKE DYTËSORE**

Kjo Kontratë për ofrimin e shërbimit të ndihmës juridike dytësore (Kontrata) lidhet sot në \_\_\_\_\_, në datën \_\_\_\_\_.2020, nga dhe nëpërmjet palëve si me poshtë:

**Prokuroria** \_\_\_\_\_, përfaqësuar nga Z/Znj. \_\_\_\_\_

(këtu me poshtë referuar si “Kontaktori”)

Dhe

**Z/Znj.** \_\_\_\_\_, shtetas \_\_\_\_\_, lindur me \_\_\_\_\_

Banues në \_\_\_\_\_, identifikuar me ID/Pasaportë me numër personal \_\_\_\_\_, (këtu më poshtë referuar si “Ofertuesi i Shërbimit”)

Palët në këtë Kontratë do të referohen veçmas si “Pala” ose së bashku si “Palët”.

**NENI 1**

**OBJEKTI I KONTRATËS**

- 1.1 Objekti i kësaj Kontrate është ofrimi i shërbimit të Ndhmës Juridike Dytësore nga Ofruesi i Shërbimit në favor të personave që kanë përfituar sipas një vendimi të formës së prerë të gjykatës kompetente të drejtën e përfitimit të kësaj ndihme falas sipas përcaktimeve të ligjit nr. 111/2017.

**NENI 2**

**HYRJA NË FUQI DHE KOHËZGJATJA**

- 2.1 Kjo Kontratë hyn në fuqi në datën e nënshkrimit të saj nga të dyja Palët dhe është e vlefshme për një afat 1 (një) vjeçar nga data e nënshkrimit, por në çdo rast deri në miratimin e listës së re dhe lidhjes së kontratave të reja.

---

*Këshilli i Lartë i Prokurorisë, Rruga “Qemal Stafa” Nr. 1, godina e Prokurorisë së Përgjithshme, Tiranë*

[www.klp.al/](http://www.klp.al/) *adresa e mail; [info@klp.al](mailto:info@klp.al)*

2.2 Afati i kësaj Kontrate mund të rinovohet me marrëveshje me shkrim mes Palëve.

2.3 Përfundimi i Kontratës 1 vjeçare nuk e pengon ofruesin e shërbimit të përfaqësojë përfaqësuesin deri në zgjidhjen përfundimtare të çështjes përveç kur ekzistojnë rrethana për zëvendësimin e tij.

### **NENI 3**

#### **PARIMET E OFRIMIT TË NDIHMËS JURIDIKE DYTËSORE**

3.1 Dhënia e Ndhmës Juridike Dytësore nga Ofruesi i Shërbimit bazohet vecanërisht mbi parimet e më poshtme:

- a) akses i barabartië i individëve në ndihmën juridike,
- b) barazia dhe mosdiskriminimi i individëve që gëzojnë të drejtën për ndihmë juridike,
- c) profesionalizmi në dhënien e shërbimit të ndihmës juridike,
- ç) cilësia, efica dhe efikasiteti në kosto për shërbimet e ofruara të ndihmës juridike,
- d) ruajtja e kofidencialitetit,
- dh) shmangia dhe paralajmërimi i konfliktit të interesit,
- e) mbrojtja e të drejtave të personave vulnerabël,

3.2 Përveç sa më sipër, dhënia e ndihmës juridike dytësore nga Ofruesi i Shërbimit bazohet mbi parimet e Kodit Etik të Avokatit.

3.3 Shkelja e parimeve të përcaktuara në këtë nen përbën shkelje të rëndë të kësaj Kontrate dhe passjell aplikimin e sanksioneve dhe masave disiplinore, sipas parashikimeve të Ligjit për Avokatinë apo cdo ligji tjetër të aplikueshëm.

### **NENI 4**

#### **TARIFA E SHËRBIMIT DHE MENYRA E PAGESËS**

4.1 Tarifa e ofrimit të Ndhmës Juridike Dytësore nga Ofruesi i Shërbimit, përcaktohet sipas tarifave në fuqi të miratuara, bashkëlidhur kësaj Kontrate.

4.2 Kontraktori do të paguajë Tarifën e Shërbimit në llogarinë bankare të Ofertuesit të Shërbimit me të dhënat si më poshtë:

Përfituesi

Banka

---

*Këshilli i Lartë i Prokurorisë, Rruga "Qemal Stafa" Nr. 1, godina e Prokurorisë së Përgjithshme, Tiranë*

[www.klp.al/](http://www.klp.al/) adresa e mail; [info@klp.al](mailto:info@klp.al)



SEIFT

IBAN

## NENI 5

### DETYRIMET DHE GARANCITË E PALEVË

5.1 Në kuptim të Ligjit 111/2017, shërbimet e Ndhmës Juridike Dytësore që Ofertuesi Shërbimit detyrohet të kryejë, përfshijnë por pa u kufizuar:

- Përpilimin e akteve të nevojshme për të vënë në lëvizje procesin, kërkesa, kërkesë padi ose cdo kërkesë procedurale që rezulton e nevojshme gjatë procesit në prokurori apo në gjykatë.
- Përpilimi i akteve të mbrojtjes për persona kundër të cilëve ka nisur një proces penal, gjyqësor apo administrativ.
- Mbledhja dhe përgatitja e dokumentacionit provues.
- Këshillimi mbi procesin penal/gjyqësor civil ose administrativ.
- Përfaqësimi dhe mbrojtja para prokurorit/gjykatës në çështjet penale/administrative dhe civile.
- Përgatitja e kërkesave ankimore, rekurseve kundër vendimeve gjyqësore, apo arbitrazhit.
- Përgatitja e cdo lloj kërkesë drejtuar prokurorisë apo cdo gjykate në Republikën e Shqipërisë, përfshirë Gjykatën Kushtetuese, si dhe gjykatat ndërkombëtare dhe çdo organizim në të cilin aderon Republika e Shqipërisë lidhur me çështjen, për të cilën ofron Ndhmë Juridike Dytësore, në favor të Përfituesit.
- Përveç sa parashikohet më sipër, Ofruesi i Shërbimit do të kryejë dhe të gjitha veprimet në përmbushje të detyrimeve të përcaktuara në Ligjin për Avokatinë në kuptim të Ndhmës Juridike Dytësore në Ligjin Nr. 111/2017 si dhe në këtë Kontratë.

5.2 Ofruesi i Shërbimit deklaron se:

- i. Gëzon të gjitha cilësitë profesionale dhe kualifikimet e nevojshme për të marë përsipër detyrimet sipas kësaj Kontrate.
- ii. Do të ofrojë Shërbimet e Ndhmës Juridike Dytësore me standartet më të larta profesionale si dhe në përputhje me parimet e përcaktuara në nenin 3 të kësaj Kontrate.
- iii. Do të veprojë në kohë dhe pa shkaktuar asnjë vonesë në ofrimin e Ndhmës Juridike Dytësore, menjëherë me marjen e njoftimit nga Organi i Prokurorisë mbi vendimin e

prokurorisë ose gjykatës e cila ka pranuar kërkesën për dhënien e Ndhmës Juridike Dytësore ndaj Përfituesit.

iv. Nuk do të heqë dorë nga dhënia e Ndhmës Juridike Dytësore përveç kur janë rastet e heqjes dorë të përcaktuara nga Ligji për Avokatinë përfshirë por pa u kufizuar në rastin e konfliktit të interesit.

v. Në cdo rast të detyrimit për të hequr dorë Ofruesi i Shërbimit do të informojë menjëherë prokurorin/gjykatën, me qëllim zvendësimin e tij. Në këtë rast, Ofruesi i Shërbimit, do të vazhdojë të ofrojë Ndhmën Juridike Dytësore deri në zvendësimin e tij, sipas parashikimeve të Ligjit për Avokatinë si dhe do të zbatojë të gjitha detyrimet e parashikuara në Ligjin për Avokatinë.

vi. Do të ofrojë Ndhmën Juridike Dytësore në favor të Përfituesit, vetëm kundrejt Tarifës së Shërbimit pa pasur të drejtën e përfitimeve të tjera përveç Tarifës së Shërbimit.

vii. Do të sigurojë përmbushjen e detyrimeve sipas kësaj Kontrate duke mbajtur të pa dëmtuar Kontraktorin nga cdo veprim kundër tij.

viii. Do mbajë kontakte të rregullta dhe të vazhdueshme me Përfituesin me qëllim informimin e tij të vazhdueshëm mbi çështjen për të cilin ofron Ndhmën Juridike Dytësore.

ix. Do të paraqesë një raport në përfundim të punës sipas formatit të miratuar nga Ministria e Drejtësisë/Organi i Prokurorisë.

5.3 Kontraktori deklaron dhe garanton se:

i. Do t'i paguajë Ofertuesit të Shërbimit Tarifën e Shërbimit pa vonesa në përputhje me këtë Kontratë.

ii. Të kryejë të gjitha veprimet dhe të zbatojë cdo detyrim sipas Ligjit nr. 111/2017, për të mundësuar dhënien e ndihmës Juridike Dytësore në favor të Përfituesit.

## NENI 6

### KLAUZOLA ANTI-KORRUPSION

6.1 Në lidhje me këtë Kontratë, përveç Tarifës së Shërbimit të parashikuar në Nenin 4 më sipër, Ofruesi i Shërbimit nuk do të përfitojë, kërkojë apo pranojë, nga Përfituesi apo palë të tjera të përfshira në proces apo konflikt me të asnjë pagesë, premtim për pagesë, përfitim, dhuratë apo shpërblim, drejtëpërdrejtë apo në mënyrë të tërthortë.

6.2 Përveç sa më sipër, Ofruesi i Shërbimit nuk do të ofrojë, apo të premtojë, vetë apo nëpërmjet personave të tretë, në favor të Palëve apo subjekteve të përfshira në proces ku

Ofruesi i Shërbimit jep Ndhimën Juridike Dytësore, asnjë pagesë, përfitim, dhuratë apo shpërblim.

6.3 Çdo shkelje e parshikuar sipas paragrafit 6.1 dhe 6.2 sa më sipër do të përbëjë veprë penale në kuptim të legjislacionit penal në fuqi dhe Ofruesi i Shërbimit, do të jetë subjekt procedimi sipas legjislacionit procedural penal dhe subjekt i procedimit etik, sipas legjislacionit për profesionin e avokatit.

## **NENI 7**

### **KONTRAKTUESI I PAVARUR**

7.1 Palët e kësaj Kontrate bien dakord që Ofruesi i Shërbimit është kontraktues i pavarur në raport me Kontraktorin dhe për asnjë arsye ose shkak nuk do të konsiderohet si punëmarës i tij.

## **NENI 8**

### **PARIMI I MIRËBESIMIT DHE KONFIDENCIALITETIT**

8.1 Palët nuk do të dëmtojnë interesat e njëra-tjetrës, reputacionin dhe imazhin. Ato do të veprojnë në mirëbesim ndaj njëra-tjetrës dhe do të respektojnë të drejtat dhe detyrimet e përcaktuara nga kjo Kontratë, ligji dhe konventat ndërkombëtare.

8.2 Palët do të veprojnë në mirëbesim duke kryer të gjitha veprimet e nevojshme për mbrojtjen e interesave të ligjshëm të secilës Palë.

8.3 Palët janë të detyruar të mbajnë rreptësisht konfidenciale këtë Kontratë, përmbajtjen e saj, të dhënat personale respektive si dhe çdo të dhënë tjetër pa asnjë kufizim.

8.4 Asnjë prej Palëve nuk do të konsiderohet se është në shkelje të këtij detyrimi nëse përhapja apo transferimi i interesave e të dhënave të mësipërme buron nga një detyrim ligjor përfshirë por pa u kufizuar në përmbushjen e detyrimeve të vendosura nga Ligji nr 9887, datë 10.03.2008 “Për mbrojtjen e të dhënave personale”

## **NENI 9**

### **PËRFUNDIMI I KONTRATËS**

9.1 Kjo Kontratë përfundon rregullisht sipas afatit të përcaktuar në Nenin 2 të saj.

9.2 Kontraktori mund të zgjidhë menjëherë këtë Kontratë në rast se Ofruesi i Shërbimit shkel ndonjë prej detyrimeve të parashikuara në këtë Kontratë, apo në Ligjin nr.111/2017.

9.3 Ofruesi i Shërbimit mund të zgjidhë këtë Kontratë duke njoftuar paraprakisht Prokurorin/Gjykatën. Në këtë rast Ofruesi i Shërbimit, do të vazhdojë të ofrojë Ndhimën Juridike Dytësore ndaj Përfituesit deri në zevendësimin e tij nga Prokuroria/Gjykata.

## **NENI 10**

### **TË NDRYSHME**

10.1 Kjo Kontratë përbën të gjithë marrëveshjen dhe mirëkuptimin mes Palëve dhe shfuqizon çdo marrëveshje tjetër të mëparëshme ndërmjet Palëve në lidhje me objektin e saj.

10.2 Asnjë ndryshim, përfundim, heqje dorë nga çdo pikë e kësaj Kontrate nuk do të ketë efekt nëse nuk është me shkrim dhe e nënshkruar nga Palët.

10.3 Mos ushtrimi apo vonesa në ushtrimin e një të drejte ose dëmshpërblimi të përcaktuar në këtë Marrëveshje ose në ligj nuk përbën heqje dorë nga e drejta ose dëmshpërblimi apo heqje dorë nga të drejta ose dëmshpërblime të tjera. Asnjë ushtrim pjesor apo i plotë i së drejtës ose dëmshpërblimit të parashikuar në këtë Kontratë nuk ndalon ushtrimin e mëtejshëm të të drejtave ose dëmshpërblimeve të tjera.

10.4 Kjo Kontratë do të rregullohet dhe interpretohet në përputhje me Legjislacionin e zbatueshëm të Republikës së Shqipërisë.

10.5 Palët do të përpiqen t'i zgjidhin me mirëkuptim të gjitha mosmarrëveshjet që mund të lindin gjatë zbatimit të Kontratës. Nëse kjo nuk është e mundur juridiksioni kompetent për zgjidhjen e mosmarrëveshjeve që burojnë nga ekzekutimi i kësaj Kontrate është Gjykata e Rethit Gjyqësor Tiranë.

## **PALET**

**KONTRAKTORI**

**OFRUESI I SHËRBIMIT**

**PROKURORI**

**AV.** \_\_\_\_\_

\_\_\_\_\_